

名賢氏族言行類稿

三三三





欽定四庫全書

名賢氏族言行類稿卷五十

宋 章定 撰

樂

九百九十

姓纂宋微子之後戴公生公子衎字樂父子孫以王
父字為氏

左傳襄九年宋樂喜為司城以為政使樂遄庀刑器
昭二十二年宋樂祁為司城樂大心為右師樂輓為大

司寇以靖國人

宣十二年楚許伯御樂伯攝叔為右以致晉師樂伯曰吾
聞致師者左射以散代御執轡御下兩馬掉鞅而還
成十五年華元使向戌為左師樂裔為司寇以靖國人
文七年宋樂豫為司馬昭公將去羣公子樂豫曰不可
公族公室之枝葉也

孟子樂正子見孟子曰克告於君君為來見也嬖人有
臧倉者沮君君是以不果來也

新序樂毅合連四國之兵以伐齊大破之遂屠七十餘城

史記樂毅其先祖曰樂羊羊為魏文侯將毅使燕燕王以為亞卿後為上將軍并護趙楚韓魏燕之兵伐齊下齊七十餘城封為昌國君

樂間毅之子復為昌國君樂乘樂間之宗也在趙封為武襄君樂叔乘之孫也高帝封之樂鄉號曰華成君樂氏之族有樂瑕公樂臣公

後漢樂恢字伯奇為功曹選舉不阿請託無所容入為
尚書僕射諸所刺舉無所迴避

魏志樂進字文謙陽平衛國人以膽烈從太祖 武力
既弘計畧周備奮彊突固無堅不陷自援枹鼓手不
知倦遷右將軍 子緄果毅有父風至揚州刺史

晉書樂廣字彥輔涑陽人王戎舉為秀才裴楷薦辟太
尉掾轉太子舍人尚書令衛瓘見而奇之曰此人之水
鏡見之瑩然若披雲霧而覩青天 累遷侍中河南

尹為政無當時功譽每去職遺愛為人所思王澄
等任放為達廣曰名教內自有樂地何必乃爾

南史樂藹字蔚遠廣六世孫仕梁累遷御史中丞性

公彊居憲臺甚稱職子法才字元備幼有美名沈

約曰法才實才子為建康令不受俸秩比去將至百

金縣曹啓輸臺庫梁武嘉其清節曰可以為百城表

矣歷少府卿

孝義樂頤之字文德父亡水漿不入口數日仕至郢州

中從事 樂預字文介亦至孝父亡悲感悶絕後為
永世令人懷其德

北史樂運字承業涉獵經史事母以孝聞仕周除萬年
縣丞抑挫豪右號稱強直為露門學士 常願處一
諫官從容諷議發憤錄夏商以來諫爭事集而部之
名曰諫苑奏上隋帝嘉焉

儒林樂遜字遵賢受孝經論語詩書禮易左氏春秋周
文召遜教授諸子在館六年與諸儒分授經業

宋朝樂史字子正撫州宜春人也母夢異人令吞五色珠而生史史有文辭初仕江南歸朝舉進士知陵州獻金明池賦召為三館編修子黃目舉進士官至給事

卓 九百九一

姓纂史記蜀郡卓氏用鐵冶致富即鐵山鼓鑄至僮千人田池射獵之樂擬於人君

後漢卓茂字子康南陽人父祖皆至郡守習詩禮及

厯算稱為通儒 為密令吏人親愛不忍欺之道不

拾遺蝗不入界 光武即位先訪求茂以為太傅封

褒德侯

偃 九百九二

列仙傳有偃佺

角 九百九三

漢初商山四皓有角里先生後漢有角若叔

濁 九百九四

史記胃脯簡微耳濁氏連騎

畢

九百九五

姓纂周文王第十五子畢公高之後以國為氏

左傳閔元年卜偃曰畢萬之後必大萬盈數也魏大名

也以是始賞天啓之矣天子曰兆民諸侯曰萬民今

名之大以從盈數其必有衆初畢萬筮仕於晉遇屯

之比辛廖占之曰吉

僖二十四年富辰曰周公封建親戚以蕃屏周畢元鄆

郇文之昭也

晉書畢卓字茂世新蔡人為吏部郎比舍郎酒熟卓因
醉盜飲之嘗曰得酒滿數百斛船四時甘味置兩頭
右手持酒杯左手持蟹螯拍浮酒船中便足了一生

矣

北史畢衆敬仕宋位太山太守仕魏為兖州刺史篤於
氣類深有國士之風 子元賓少豪俠有武幹復拜

兖州刺史 曾孫義雲累遷都官尚書郎中文宣時

除書侍御史 衆敬弟衆愛

唐畢誠字存之夜燃薪讀書母卹其疲奪火使寐不肯

息遂通經史工辭章性端慤不妄交舉進士書判拔

萃連中 累官駕部倉部郎故事要家勢人以倉駕

二曹為辱誠沛然如處美官無異言 党項擾河西

宣宗嘗召訪邊事誠援古今條破羌狀甚悉帝悅曰

吾將擇帥不意頗牧近在禁庭即除邠寧節度河西

安撫使誠到軍羌人皆順置屯田收穀三十萬斛以

省度支經費 懿宗立以禮部尚書同平章事 吏

術尤長既貴所俸祿養護宗族之乏無間然

畢構字隆擇河南人六歲能文擢進士第為潤州刺史

政有惠愛 李傑為河南尹與構一時選世謂畢李

復為益州長史按察劍南振弊柅私號為清嚴睿

宗嘉構修潔獨行有古人風其治術又為諸使最賜

璽書袍帶

宋朝畢士安字仁叟代州雲中人也後居鄭州舉進士

真宗為開封尹以士安為判官東宮建兼右庶子
真宗即位即令士安攝府事李沆薨中書闕宰相乃
拜士安吏部侍郎參知政事入謝真宗曰未也行且
相卿士安曰寇準方正慷慨有大節朝臣罕出其右
如準者陛下所宜用也真宗亦欲相準藉士安宿德
以鎮之不閱月與準並相真宗幸澶州歲遺遼銀
絹三十萬是時朝論皆以為過士安曰不如此彼所
顧不重和事恐不能久衆未為然也然自景德以來

百有餘年自古和好所未嘗有議者以士安之言為
得焉薨謚文簡子世長官至衛尉卿孫從古尚
書駕部郎曾孫四人仲偃字希言以清德聞興郡
亦有聲少與蔡京錢塘同官京持國柄二十餘年不
以一字通積官朝議大夫享年八十六無病坐亡
仲行字夷仲舉進士中第為中書檢正奉使契丹宴
射連破的衆驚異之以祕閣校理同知太常禮院為
官制局檢討官制文字千萬計區分損益曲盡其當

高麗使入貢詔館之上元夕宴東闕下作詩誦聖德
神宗次韻賜焉擢起居郎 仲游字公叔與仲行同
登第元祐初為軍器衛尉丞召試學士院蘇軾異其
文擢為第一提點河東路刑獄太原銅器名天下獨
不市一物懼人以為矯也且行買二茶匕而去韓縝
曰如公叔可謂真清矣入為吏部郎中言孔子廟自
顏回以降皆爵命冠冕居正而子鯉孫伋乃野服幅
巾以祭為不稱詔皆追侯之仲游為文切於事理而

有根柢不為浮夸詭誕 仲愈字將叔歷國子監丞
坐兄仲游陷黨籍例廢黜徽宗曰畢仲衍被遇先帝
可除罪籍以仲愈為都官郎中擢祕書少監

鄧

九百九十六

風俗通鄧殷時侯國也子孫氏焉漢鄧都之後居河
東

史記酷吏鄧都楊人也孝景時都為中郎將敢直諫面
折大臣於朝濟南閻氏宗人三百餘家豪猾二十石

莫能制景帝拜都為濟南太守至則族滅閻氏首惡
餘皆股栗 問遺無所受請寄無所聽 遷為中尉
行法不阿貴戚列侯宗室見都側目而視號曰蒼鷹
後漢邳惲字君章隱於弋陽山中志在從政喟然嘆曰
天生俊士以為人也舉孝廉為上東城門侯帝出獵
夜還惲拒關不開後為長沙太守 子壽字伯孝善
文章以廉能稱舉孝廉遷冀州刺史時冀部諸王賓
客放縱壽按之無所容貸 遷尚書令朝廷每有疑

議常獨進見肅宗竒其智策擢為京兆尹強豪震竦
各相檢敕莫敢干犯

吉 九百九十七

姓纂黃帝之胤伯儵之後一云尹吉甫之後以王父

字為氏

晉忠義吉挹字祖冲祖朗為御史中丞西朝傾覆隕身

守節 挹亦忠節

南史吉士瞻字梁容少有志氣仕梁為直閣將軍出為

西陽武昌二郡在郡清約家無私蓄

循吏吉翰字休文為益州刺史在任著美績甚得方伯

體

孝義吉盼字彥霄幼有孝性後裴儉等連名薦盼以為
孝行純至明通易老敕付太常旌舉

唐吉頊洛州人舉進士第擢右肅政臺中丞來俊臣下
獄司刑當以死狀三日不下頊曰俊臣誣殺忠良罪
惡如山國蝨賊也由是后斬俊臣

乙 九百九十八

姓纂殷湯字天乙支孫以王父字為氏

北史乙瓌代人也其先世統部落父匹知遣瓌入貢太

武留之瓌善騎射手格猛獸從駕南征勇冠三軍

後為西道都督子乾歸有氣幹頗習書疏尤好兵

法後為秦州刺史有惠政子海字懷仁位至散騎侍

郎海子瑗字雅珍累遷兗州刺史

密

九百九十九

風俗通密康公之後以國為氏

栗 一千

栗陸氏之後漢有栗融字客卿

媯 十一

左傳宣三年燕媯夢天使與已蘭注燕媯南燕姓

述 十二

魯大夫仲述之後

帥 十三

狀云本姓師氏避晉景王諱改為師氏

漆 千四

魯相漆雕開之後單姓漆氏

實 千五

實沉之後

悉 千六

師悉諸之後

恤 千七

晉大夫恤由之後

暨

千二十四
音訖

吳志暨豔字子林吳郡為選曹郎至尚書

唐天寶中有暨晃弟昱暨佐時上元中准制改姓為周

氏

弟 千二十五

左傳有弟幹胡

邠

千二十六
音弗

漢有九江太守邾修

漢書

漢書

九

漢書

漢書

漢書

名賢氏族言行類稿卷五十

欽定四庫全書

名賢氏族言行類稿卷五十一

宋 章定 撰

郭

千二十七

姓纂周文王季弟號叔受封於號或曰郭公因以為

氏公羊傳云號謂之郭聲之轉也左傳齊有郭最燕

有郭隗 郭隗燕昭王築宮而師事之致士先從隗

始

前漢游俠郭解河內軹人

後漢郭賀字喬卿拜荊州刺史百姓歌曰厥德仁明郭
喬卿忠正朝廷上下平 顯宗賜以三公之服黼黻
冕旒勅行部去襜帷使百姓見其容服以章有德

郭丹字少卿買符入函谷關慨然嘆曰丹不乘使者車
終不出關至京師常為都講諸儒咸敬重之更始徵
為諫議大夫持節使歸南陽果乘高車出關

郭伋字細侯後拜潁川太守帝勞曰賢能太守去帝城

不遠河潤九里冀京師并蒙福也
行部到西河童兒數百騎竹馬迎拜於道次

郭躬字仲孫潁川人為廷尉決獄斷刑多依矜恕乃條諸重文可從輕者四十一事奏之皆著於令父弘為決曹掾用法平諸為弘所決者退無怨情躬弟鎮亦至廷尉郭氏數世傳法律子孫至公者一人廷尉七人侯三人刺史二千石侍中郎將二十餘人

郭泰字林宗母使給事縣庭曰大丈夫焉能處斗筲之

役乎與李膺友善名震京師後歸故里衣冠諸儒送之河上車數千兩林宗唯與膺同舟而濟衆賓望之以為神仙嘗遇雨中一角墊時人故折巾一角以為林宗中泰聞黨人之死私為之慟曰詩云人之云亡邦國殄瘁漢室滅矣未知瞻烏爰止于誰之屋耳申屠蟠亦歎曰昔戰國之世處士橫議列國之王至為擁篲先驅卒有坑儒燒書之禍今之謂矣司馬溫公曰天下有道君子揚於王庭以正小人之罪而

莫敢不服天下無道君子囊括不言以避小人之禍
而猶或不免黨人生昏亂之世不在其位四海橫流
而欲以口舌救之臧否人物激濁揚清撩虺蛇之頭
踐虎狼之尾以至身被淫刑禍及朋友士類殲滅而
國隨以亡不亦悲乎夫唯郭泰既明且哲以保其身
申屠蟠見幾而作不俟終日卓乎其不可及也
方術郭玉學方診六微之技為太醫丞

郭憲汝南宋人光武立求天下有道之人徵憲拜博士

嘗從駕南郊忽向東北含酒三噀詔問其故曰齊國
失火後齊果上火災與郊同日

魏志郭嘉字奉孝陽翟人荀彧薦為司空軍祭酒深通
有算畧達於事從征伐十有一年每有大議臨敵制
變平定天下謀功為高

郭淮字伯濟陽曲人在關右三十餘年功績顯著以淮
為車騎將軍儀同三司進封陽曲侯

晉郭彰字叔茂賈后從舅豫參權勢賓客盈門

郭舒字雅行後為右丞

郭奕字大業為尚書有重名當世朝臣皆出其下

郭象字子玄語如懸河瀉水注而不竭閒居以文論自

適任職當權熏灼內外

郭璞字景純博學高才詞賦為中興之冠洞五行天

文卜筮之術

文苑郭澄之字仲靜陽曲人少有才思機敏兼人位至

相國從事中郎封南豐侯

隱逸郭琦字公偉晉陽人著書百卷

郭文字文舉河內軹人少愛山水尚嘉遯步擔入吳興餘
杭山中無人之地倚木于樹苦覆其上而居焉

郭翻字長翔伯父訥廣州刺史父察安城太守 翻少
有志操不交世事惟以漁釣射獵為娛

郭荷字承休隱張掖東山謚曰玄德先生

郭瑀字元瑜少有超俗之操隱於臨松薤谷 心與至
境冥符志與四時消息

藝術郭磨明易善筮

南史循吏郭祖深仕梁至南津校尉公嚴清刻不避強禦
孝義郭世通居父喪殆不勝哀母亡負土成墳救陪表
門閭改所居獨楓里為孝行焉 子原平字長恭又
稟至行養親必以己力傭賃以供養

隱逸郭希林曾祖翻晉世高尚不仕希林少守家業徵
召一無所就 子蒙亦隱居不仕

北史郭祚字季祐尺牘文章見重於世弱冠為州主簿

孝文初舉秀才嘗飲清徽園孝文舉觴曰郭祚憂勤庶事獨不欺我不勸此人當誰勸也復為吏部尚書重惜官位至於銓授假令得人必徘徊久之然後下筆所拔用者皆量才稱職子景尚字思和遷太尉從事中郎公強當世善事權寵世號曰郭尖

郭彥少知名仕周為澧州刺史勸以耕稼人皆務本郭衍字彥文少驍武善騎射仕隋以軍功遷大將軍郭榮字長榮仕隋為內史舍人後拜右侯衛大將軍煬

帝曰誠心純至如郭榮者固無雙矣

孝行郭文恭年踰七十父母喪孝慕罔極尚書聞奏標

其門閭

節義郭世嵩字弘乂七世同居大豕同乳烏鵲同巢表

其門閭

唐郭正一定州人永隆中檢校中書侍郎詔與郭待舉
岑倩魏玄同並中書門下承受進止平章事平章事
自正一始永淳中真遷中書侍郎執政久明習故事

文辭詔敕多出其手

郭孝恪許州人少有奇節不治貲產隋亂率少年數百
附李密喜謂曰汝穎多奇士不謬也 竇建德之援
洛也孝恪上謂秦王進計曰王世充刀竭計窮其面
縛可跂足待建德悉衆遠來糧餉阻絕殆天亡之也
若固守虎牢以軍汜水隨機應變禽珍必矣王然之
賊平語諸將曰孝恪策擒賊固在諸君右遷上柱國
貞觀十六年改安西都護孝恪推誠撫御盡得其歡

心子待封

郭震字元振魏州人少有大志十六為太學生家嘗送
錢四十萬會有繯服者叩門自言五世未葬願假以
治喪元振舉與之無少吝一不質名氏薛稷等歎駭
之十八舉進士為通泉尉武后召與語竒之索所為
文上寶劍篇后覽嘉歎突厥吐蕃聯兵寇涼州后
拜元振都督元振置和戎城自是州無虜憂神龍
中遷安西大都護睿宗立召為太僕卿將行安西酋

長有務面哭送者旌節下玉關去涼州猶八百里城中爭具壺漿歡迎 玄宗誅太平公主睿宗御承天門諸宰相走伏外者獨元振總兵扈帝進封代國公少雄邁及貴居處乃儉約手不置書人罕見其喜愠至宰相而親具者唯元振云

郭子儀字子儀華州人以武舉異等累官天德軍使安祿山反詔子儀率本軍東討賊陷常山河北郡縣皆沒會李光弼攻賊常山拔之子儀引軍下井陘與光

弼合破史思明祿山益出精兵佐思明子儀曰彼恃
加兵必易我而心不固戰必克矣於是晝揚兵夜擣
壘賊不得息乃與光弼等擊賊斬首四萬河北諸郡
往往斬賊守迎王師方北圖范陽會天子入蜀太子
即位靈武詔班師子儀與光弼率步騎五萬赴行在
時朝廷草昧軍容缺然及是國威大振 肅宗大閱
六軍鼓而南房瑄陳濤師敗帝唯倚朔方軍為根本
至德二載破崔乾祐通關陝路 從元帥廣平王率

蕃漢兵十五萬收長安河東河西河南州縣悉平以
功加司徒封代國公帝遣具軍容迎灞上勞之曰國
家再造卿力也乾元元年破賊河上執安守忠以獻
遂朝京師詔百官迎於長樂驛帝御望春樓待之進
中書令收衛州圍相州召子儀還更以趙王為天
下兵馬元帥李光弼副之議者謂子儀有社稷功
李光弼失河陽河中太原軍亂朝廷憂二軍與賊
合而少年新將望輕不可用遂以子儀為元帥進封

汾陽郡王屯絳州帝引至卧内謂曰河東一以委卿
至屯誅首惡王元振數十人諸鎮皆惕息 代宗立
梁崇義據襄州叛僕固懷恩陰召回紇吐蕃犯奉天
武功拜子儀為關内副元帥至咸陽賊已過渭水並
南山而東天子跳幸陝子儀還京師子儀自相州罷
歸京師部曲離散及是率騎南收兵得武關防卒及
亡士數千會六軍將張知節迎子儀洛南大閱兵屯
商州威震關中紿曰郭令公來虜懼夜潰破賊書聞

帝以子儀為京城留守自變生倉猝賴子儀復安故
天下皆咎程元振羣臣數論奏元振懼乃說帝都洛
陽帝可其計子儀曰云云願陛下抑閣寺任直臣委宰相
以簡賢任能付臣以訓兵禦侮則中興之功日月可
冀帝得奏謂左右曰子儀固社稷臣也朕西決矣乃
賜鐵券圖形凌煙閣 僕固懷恩誘吐蕃回紇党項
入寇朝廷患之詔子儀屯奉天帝問計所出對曰無
能為也已而賊遁子儀至涇陽恩賚崇縟進拜尚書

令懇辭不受具所以讓付史館 永泰元年復鎮河
中懷恩盡說吐蕃回紇等三十萬掠涇邠躡鳳翔京
師大震子儀屯涇陽軍纔萬人比到虜騎圍已合子
儀身率鎧騎二千出入陣中回紇怪問是謂誰報曰
郭令公驚曰懷恩言天可汗棄天下令公即世中國
無主故我從以來令公今存天可汗存乎報曰天子
萬壽回紇悟曰彼欺我乎子儀使諭虜回紇曰今誠
存我得見乎子儀將出左右曰狼子野心不可信曰

今力不敵吾將示以至誠即傳呼曰令公來虜皆持
滿子儀以數十騎出免胄見其大首曰諸君同艱難
久矣何忽亡忠誼而至是邪回紇捨兵下馬拜曰果
吾父也會懷恩暴死羣虜無所統一遂許諾吐蕃疑
之引去子儀遣將白元光大軍繼之破吐蕃十萬於
靈臺西原遂還河中 回紇赤心請市馬萬匹有司
以財乏止市千匹子儀請內一歲奉佐馬直薨年八
十五謚忠武配饗代宗廟廷 子儀事上誠御下恕

賞罰必信遭幸臣短毀握兵處外詔至即日就道無
纖介顧望故讒間不行 田承嗣傲狠不軌子儀嘗

遣使至魏承嗣西望拜指其膝謂使者曰茲膝不屈
於人久矣今為公拜 子儀禁無故軍中走馬南陽

夫人乳母之子犯禁都虞候杖殺之諸子泣訴於子
儀且言都虞候之橫子儀叱遣之明日以事語僚佐
而嘆息曰子儀諸子皆奴材也不賞父之都虞候而
惜母之乳母子非奴材而何 宿將數十皆王侯貴

重子儀頤指進退若部曲然幕府六十餘人後皆為
將相顯官其取士得才類此與李光弼齊名而寬厚
得人過之其歲入官俸無慮二十四萬緡前後賜良
田美器名園甲館不勝紀代宗不名呼為大臣以身
為天下安危者二十年校中書令考二十四八子七
壻皆貴顯富貴壽考哀榮終始人臣之道無闕焉子
曜盱眙吐晤曖曙映而四子以才顯 曜性沈靜資
貌瑰傑子儀征伐曜治家事少長無間言以朴簡自

處累遷太子太保卒贈太子太傅 晞善騎射從征

伐有功復兩京出奇兵破賊累進鴻臚卿太子賓客

趙國公 暖尚昇平公主封清源縣侯金紫光祿大

夫遷太常卿子鏞恭遜折節不以富貴加人性周畏

不立赫赫名有諫於上退必毀稿家人子弟無知者

拜右金吾將軍封太原郡公充閑廐宮苑使 曙官

司農卿德宗幸奉天從乘輿擢金吾大將軍終祁國

公

郭承嘏晞孫字復卿幼秀異通五經元和及進士第
累遷起居舍人居母喪以孝聞

郭虔瓘齊州人開元初錄軍閥累遷右驍衛將軍

郭知運字逢時瓜州人援臂虎口以格鬪功累補秦州

三度府果毅從郭虔瓘破突厥有功屯西方戎夷

畏之與王君奭功名畧等時號王郭帝詔中書令張

說紀其功子英傑英乂英傑字孟武英乂字元

武以武勇有名哥舒翰見之曰是當代吾節制者

五代郭崇韜代州雁門人也為河東教練使為人明敏能應對以材幹見稱莊宗為晉王孟知祥為中門使崇韜為副使中門之職參管機要先時中門使相繼獲罪知祥懼求外任莊宗曰公欲避事當舉可代公者知祥乃薦崇韜為中門使甚見親信 康延孝自梁奔唐先見崇韜崇韜延之卧内盡得梁虛實延孝言梁方召諸鎮兵欲大舉唐將皆憂惑以謂成敗未可知莊宗患之以問諸將諸將皆曰唐得鄆州隔河

難守不若棄鄆與梁西取衛州黎陽以河為界與梁
約罷兵無相攻庶幾以為後圖莊宗不悅退卧帳中
召崇韜問計崇韜曰陛下興兵仗義將士疲戰爭生
民苦轉餉者十餘年矣況今大號已建自河以北人
皆引首以望成功而思休息今得一鄆州不能守而
棄之雖欲指河為界誰為陛下守之且唐未失德勝
時四方商賈征輸必集薪芻糧餉其積如山自失南
城保楊劉道路轉徙耗亡大半而魏博五州秋稼不

稔竭民而斂不支數月此豈按兵持久之時乎臣自
康延孝來盡得梁之虛實此真天亡之時也願陛下
分兵守魏固楊劉而自鄆長驅擣其巢穴不出半月
天下定矣莊宗大喜曰此大丈夫之事也即日下令
軍中歸其家屬於魏夜渡楊劉從鄆州入襲汴川八
日而滅梁莊宗推功賜崇韜鐵券拜侍中成德軍節
度使依前樞密使莊宗與諸將以兵取天下而崇韜
未嘗居戰陣徒以謀議居佐命第一之功位兼將相

遂以天下為己任 崇韜素廉自入洛始受賂遺曰
吾豈少比耶今藩鎮諸侯多梁舊將一切拒之豈無
反側且藏予私室何異公帑明年南郊悉獻所藏以
佐賞給累表自陳乞身優詔不允因建天下利害二
十五事施行之 崇韜有大畧已破蜀因遣使者以
唐威德風諭諸蠻欲因以綏來之可謂有志矣

宋朝郭崇應州金城人也初名崇威避周祖諱止稱崇
崇弱冠以勇力應募仕周為陳州節度使同平章事

世宗親征太原崇副符彥卿將行營之師軍還加侍
中移鎮成德世宗征淮甸契丹萬騎掠邊境崇帥師
破之於東鹿斬首數百級俘人口牛羊三萬餘至國
初加兼中書令初太祖受禪崇感周室恩遇或時出
涕為監軍所奏太祖曰我素知崇篤於恩義有所感
激爾遣人覘之還言崇方與賓屬飲博城中晏如也
太祖笑曰果如吾言未幾來朝李重進叛命崇為節
制乾德三年卒子守璘守璘子允恭累官至崇

儀副使允恭次女仁宗后也

郭守文并州太原人父暉仕漢為護聖軍使有勇畧從周太祖征河中戰死守文年十四居喪哀毀召隸帳下補左班殿直至國初遷西頭供奉官潘美征嶺南擒劉鋹遣守文馳傳告捷遷翰林副使從曹彬平金陵護送李煜歸闕煜頗自歎守文語之曰國家開拓境土以致太平豈責防風之後至耶煜心遂安雍熙五年大舉北伐為幽州道行營前軍步軍水陸都監

與契丹遇為流矢所中氣色不撓戰益急左右騎從
莫之知也軍中服其量卒謚忠武守文沉厚有謀頗
知書既卒有使自北邊來言守文死軍中皆為流涕
太宗問何以致此對曰守文得俸悉以犒士卒死之
日家無餘財太宗為歎息久之賜其家錢五百萬後
太宗為真宗納守文之次女為夫人即章穆皇后也
追封守文譙王

郭成德順軍中安堡人也少以應募為弓箭手元豐中

大合五道兵趨靈武成將涇原選鋒賊守漫哆隘以拒王師成出奇奮擊之至靈武有番酋介馬馳突統制劉昌祚大破之為涇原第十副將以功遷引進使雄州防禦使涇原路鈐轄轉客省使卒成姿貌豐偉襟度坦然撫養孤窮疎財好施名震西鄙云子

浩

郭忠恕字恕先洛陽人也善屬文周太祖召為周易博士國初與監察御史符昭文爭忿朝堂貶乾州司戶

遂不仕進太宗聞其名召為國子監主簿令刊定歷代字書忠恕縱酒肆言時政頗有諂讟語聞配流登州至齊州臨清謂部送吏曰我逝矣因拮地為穴度容面俯窺焉而卒藁葬道左後數月故人欲改葬但衣衾而已

郭祥正字功父當塗人也其母夢李太白而生祥正少有詩名梅堯臣曰天才如此真太白後身也王安石亦歎美其詩舉進士知武岡縣致仕居姑熟後復出

為通判汀州後知端州復棄去遂家於當塗之青山
郭贄字仲儀襄邑人舉進士中首薦知荆南府屬久
旱方盛陳禱雨之具贄至悉投之江不數日大雨
真宗嘗稱贄純厚長者特拜工部尚書翰林侍讀學
士作詩賜之有啓發冲言曉典常之語卒謚文懿

霍 千廿八

姓纂周文王第六子霍叔處之後今河東有霍邑是
其故都子孫以國為氏

左傳僖公二十四年富辰曰昔周公封建親戚以蕃屏周
管蔡邲霍文之昭也

襄公二十九年叔侯曰虞虢焦滑霍楊韓魏皆姬姓也晉
是以大

前漢霍去病為驃姚校尉斬捕過當封冠軍侯進驃騎
將軍 凡六出擊匈奴斬首捕虜數萬餘級 上欲
教之孫吳兵法曰顧方畧何如耳不至學古兵法
上為治第曰匈奴不滅無以家為也

霍光字子孟去病弟河東平光乃以兄任為郎出入禁
近二十餘年未嘗有過後為大司馬大將軍受遺詔
輔少主 為人沉靜詳審白晳疎眉目美鬚髯每出
入殿門止進有常處不失尺寸天下想聞其風采
廢昌邑立宣帝封博陵侯 定萬世策以安社稷
後漢霍諝字叔智魏郡人明經舉孝廉入為尚書僕射
蜀志霍峻字仲邈南郡枝江人為梓潼太守卒 子戈
字紹先為中庶子甚得切磋之體

晉隱逸霍原字休明慕道清虛方成竒器以賢良徵不
到

郝 千廿九

姓纂出於赫耳氏太昊氏之佐也殷帝乙時王子期
封太原郝鄉因氏焉

南史孝義郝道福累世同爨詔表門蠲役調
世說郝隆七月七日出日中仰卧曬腹中書

唐郝處俊安州人好學嗜漢書貞觀中第進士高麗叛

詔副李勣為總管賊遽至處俊安餐不顧密昇料精
銳擊之虜卻衆壯其謀 諫二王角勝帝遽止曰處

俊遠識非衆臣所逮 諫帝欲遜位武后事遂沮

處俊臨事敢言在帝前議論必傳經義凡所規獻得
大臣體武后惡之以其操履無玷不能害之與許圜
師同里俱官達故時語曰貴如郝許 孫象賢

郝廷玉驍勇善鬪為李光弼愛將及保河陽擒徐璜玉
封安邊郡王 吐蕃犯京畿屯渭橋魚朝恩聞其善

布陣請觀之廷玉申號令鳴鼓角部伍坐作進退若一朝恩
歎曰吾處兵間今始識訓練法 累為秦州刺史

郝玘貞元中為臨涇鎮將在邊積三年每討賊不持糗
糧取之於敵獲虜必剝剔其屍虜人畏道其名以
怖啼兒

駱 千三十

姓纂姜姓齊太公之後有公子駱以王父字為氏

吳志駱統字公緒會稽人父俊字孝遠有文武才察孝

廉補尚書郎統為建忠郎將封新陽侯

南史駱文牙字旗門年十二相者云此郎容貌非常必將遠致陳文帝引為將帥勇冠衆軍

唐駱賓王義烏人七歲能賦詩武后時數上疏言事下臨海丞不得志棄官去與王勃楊炯盧照隣皆以文齊名天下

莫

三十一

姓纂漢有富人莫氏見游俠傳大歷中比部員外郎

莫藏用 河南官氏志邢莫氏改為莫氏

北史莫含魏穆愛其才器常參軍國大謀卒於左將軍
子顯為左常侍 顯子題為大將以功賜爵東宛
侯 題弟雲好學善射道武時常典選曹遷執金吾
參軍國謀議

索

千三十二

姓纂殷人七族索氏之後望燉煌晉索湛為北地太
守

晉索靖字幼安湛之子少有逸羣之量與汜衷張彪索

紆索永俱詣太學馳名海內號稱燉煌五龍 舉賢

良對策高第張勃表靖才藝絕人宜在臺閣擢尚書

郎以善草書知名 除雁門太守

藝術索統字叔徹善占夢

統占之云云君當為人

隱逸索襲字偉祖虛靖好學不應州郡之命陰澹曰索

先生碩德名儒真可以諮大義 宅不彌畝而志忽九

州形居塵俗而棲心天外謚玄居先生

北史索敞字巨振燉煌人入魏以儒學為中書博士貴遊
之子皆敬憚威嚴多所成益

鄂

千三十三

晉鄂侯之後子孫氏焉漢初功臣安平侯鄂千秋沛人

落

千三十四

風俗通云臯落氏翟國也以國為姓見左傳漢有落下

閔巴郡人撰太初曆

洛 千三十五

落下閔或作洛

恪 千三十六

晉有郎中令恪啓

薄 千三十七

風俗通衛賢人薄疑

幕 千三十八

風俗通舜祖幕支孫以王父字為氏見左傳

作 千三九

漢古今人表胙侯子孫因避地改作氏漢涿郡太守作

顯

鐸 千四十

晉有鐸遏寇楚有太傅鐸椒漢有廷尉鐸政

閣 千四十一

急就章有閣并訢唐有御史閣輔

博 千四十二

風俗通云漢有博子勞善相馬望出淮南廣平

藥

千四十三

漢有南陽太守藥崧

約

千四十四

古賢人約續

若

千四十五

古賢人若士

郡

千四十六

風俗通春秋時郡國以國為氏

名賢氏族言行類稿卷五十一

欽定四庫全書

名賢氏族言行類稿卷五十二

宋 章定 撰

石 千四七

姓纂衛大夫石碣之後又石鮒仲衛大夫生石初子
見左傳禮記

左傳隱元年石碣曰臣聞愛子教之以義方弗納於邪
五年君子曰石碣純臣也

閔二年狄人伐衛衛公與石祁子決使守曰以此贊國
擇利而為之

僖二十四年鄭伯與孔將鉏石甲父省視官具於汜而
後聽其私政禮也

昭三十二年王使富辛與石張如晉請城成周

史記石作蜀字子明孔子弟子

萬石君名奮趙人姓石氏高祖召其姊為美人以奮為
中涓徙家長安戚里孝文時至太中大夫選為太子

太傅孝景立以為九卿迫近憚之徙為諸侯相長

子建次甲次乙次慶皆以馴行孝謹官皆至二千石
號奮為萬石君 萬石君家不言而躬行 建老白

首萬石君尚無恙為郎中令每五日洗沐歸謁親取
親中帟廁踰身自澣洒 慶為太僕御史上問車中

幾馬慶以策數馬畢舉手曰六馬後為太子太傅遷
御史大夫為丞相封牧丘侯 揚子孝至篇石奮石

建父子之美也

循吏石奮楚昭王相也堅直廉正無所阿避

前漢石顯字君房為中書令貴幸傾朝持詭辯以中傷

人公卿以下畏之重足一迹 與牢梁五鹿充宗結

為黨友民歌之曰牢邪石邪五鹿客邪印何累累綬

若若邪言其兼官據勢也

晉石苞字仲容儀貌偉麗時語曰石仲容姣無雙有經

國才畧歷東萊琅邪大守所在皆有威惠終於司徒

掾 子崇字季倫諂事賈謚望塵而拜 與貴戚王

愷爭以奢靡相尚起金谷別館作錦步障五十里

石鑿字林伯為御史中丞多所糾正朝廷憚之

隱逸石坦字洪孫不娶妻妾不營產業

鄭休妻石氏少有德操年十餘歲鄉邑稱之既歸鄭氏
為九族所重

北史節義石文德祖父苗縣令黃宣在任喪亡苗以家
財殯葬自苗逮文德刺史縣令卒官者皆服制盡禮

五世同居閨門雍睦詔標門閭

節義石祖興太守田文彪縣令和真等喪亡祖興自出家絹二百餘疋營護喪事孝文嘉之賜爵一級為上

造

唐石洪字濬川其先姓烏石蘭後獨以石為氏有至行舉明經歸東都十餘年隱居不出重脩鎮河陽求賢者以自重乃具書獎邀辟後詔書召為集賢校理韓昌黎送石洪赴河陽叅謀序云先生居嵩卽瀍穀之間冬一裘夏一葛朝夕飯一盂蔬一盤問之仕則不

應坐一室左右圖書與之語道理辨古今事當否論
人高下事後當成敗若河決下流而東注若駟馬駕
輕車就熟路而王良造父為之先後也若燭照數計
而龜卜也

石雄徐州人敢殺善戰氣蓋軍中會昌初回鶻入寇雄
佐劉沔屯雲中雄選沙陀雜虜三千騎夜發直擣烏
介帳追至殺虎山斬首一萬級李彥佐討劉稹以
雄為副使破賊五壁賊大震雄臨財廉每朝廷賜

與輒置軍門自取一匹縑餘悉分士伍武宗喜曰今
將帥義而勇罕雄比者 初雄討禎水次見白鷺謂
衆曰使吾射中其目當成功一發如言

宋朝石熙載字凝績洛陽人也周時舉進士太宗征
河東從至鎮州遷給事中樞密副使未幾拜戶部尚
書樞密卒謚元懿 子中立字表臣年十三喪父
朝廷以中立為供奉官十八獻文改光祿寺丞遷殿
中丞家富於財悉推與諸父久之除直集賢院累擢

知制誥翰林學士景祐四年拜參知政事遷吏部侍郎以太子少傅致仕遷少師卒謚文定

石普其先幽州人也自言唐河中節度使雄之後自其曾祖徙居太原父通給事太宗于晉卽普方十歲亦留邸中補寄班祗候以督捕盜賊功轉內殿崇班帶御器械 普有膽畧聞敵所在卽馳赴親冒矢石前後戰未嘗少衄通兵書及陰陽六甲星厯推步之術太宗嘗令善工製金帶普帶御器械輒面求賜

金匱要略卷五十二
太宗解以賜之後雖謫廢當太宗忌日必舉族
詣佛寺齋薦歲以為常

翟千四八

姓纂黃帝之後代居翟地國語云翟國為晉所滅齊
有翟樓後魏翟黃漢文帝時廷尉翟公下邳人

新序魏文侯與士大夫坐問曰寡人何如君也皆曰君
仁君也翟黃曰君非仁君也文侯怒問任座對曰君
仁君也子何以言之對曰臣聞之其君仁者其臣直

向翟黃之言直是以知也文侯曰善復召翟黃為上
卿

前漢翟方進字子威汝南上蔡人受春秋以射策甲科
為郎遷朔方刺史居官不煩苛所察應條輒舉甚有
威名徙京兆尹搏擊豪強京師畏之 事後母甚篤

知能有餘兼通文法吏事以儒雅緣飭法律號為
通明相天子甚器重之奏事亡不當意少子義為東

郡太守

翟公為廷尉賓客闐門既罷門外可放雀羅後復為廷尉賓客欲往公為大書其門曰一死一生乃知交情一貧一富乃知交態一貴一賤交情乃見

後漢翟酺字子超廣漢人善圖緯天文歷筭四世傳詩酺好老子遷侍中拜尚書為酒泉太守斬叛羌九百級威名大震遷將作大匠損省經用歲息四五千萬請修繕太學學者為立碑銘

晉隱逸翟湯字道深篤行純素不屑世事人有饋遺雖

釜庾一無所受 寇聞其名德皆不敢犯鄉鄰賴之
徵為國子博士不起 子莊字祖休少以孝友著
名遵父之操不交人物語不及俗公車徵不就 子
矯亦有高操屢辭辟命 矯子法賜徵亦不至世有
隱行

北史孝行翟普林事親以孝聞躬耕色養鄉閭謂為楚
丘先生父母喪廬墓負土成墳有二鵲巢其廬前栢
樹入廬馴狎司隸奏其孝感擢孝陽令

五代翟光鄴字化基濮州鄆城人也年十歲為晉兵所掠明宗愛其穎悟常以自隨光鄴事唐官至耀州團練使周太祖入立拜宣徽使樞密副使出知永興軍卒於官光鄴為人沈默多謀事繼母以孝聞雖貴不營財產嘗假官舍以居蕭然僅蔽風雨雍睦親族簾衣糲食與均有無而光鄴處之晏然日與賓客飲酒聚書為樂其所臨政務以寬靜休息為意

姓纂晉大夫郤文生豹豹生芮芮生缺缺生克克生
代為晉卿又郤犨郤至亦其族也漢有侍中郤璜
左傳僖二十七年晉蒐於被廬作三軍謀元帥趙衰曰
郤穀可乃使郤穀將中軍郤溱佐之

新序晉文公將伐鄆趙衰陳所以勝鄆文公用之而勝
賞衰衰曰臣聞之郤虎賞郤虎

蜀志郤正字令先博覽傳籍弱冠能文澹於榮利而耽
意文章終巴西太守

晉郤詵字廣基博學多偉畧倜儻不拘細行舉賢良對
武帝曰臣猶桂林之一枝崑山之片玉為左丞累遷
雍州

白 十五十

姓纂黃帝之後秦大夫白乙丙楚有白公勝楚平王
太子建之子也

史記白起郿人善用兵事秦昭王為左庶長攻韓魏趙
楚遷為武安君

史記貨殖白圭周人樂觀時變人棄我取人取我予趨利若
猛獸擊鳥之發天下善治生者祖白圭

北史白建字彥舉仕齊歷都官尚書雖無它才伎勤於
公以溫柔自處以典執兵馬致位卿相

唐白居易字樂天其先太原人徙下邳敏悟絕人工文
未冠謁顧況況曰吾謂斯文遂絕今復得子矣貞元
擢進士拔萃皆中補校書郎元和元年對制策一等
召入翰林為學士遷左拾遺四年旱甚居易建言

乞盡免江淮兩賦以救流瘠 王鏐將加平章事居

易以宰相天下具瞻非重望不可王鏐以誅求為羨

餘因假之名器四方聞之謂陛下得所獻與宰相

王承宗叛帝詔吐突承璀率師出討居易諫中人為

制將四方聞之益輕朝廷後諸軍討王承宗者久無

功居易上言其害有四可為痛惜者二可為深憂者

二 俄有言居易母墮井死而居易賦新井篇 後

為司門員外郎知制誥穆宗好畋遊獻續虞人箴以

諷 轉中書舍人田布遺五百縑辭不受 河朔亂

詔諸道出兵遷延無功居易上言雖進忠不見聽

遷杭州刺史築堤捍錢塘溉田千頃復浚李泌六井

民賴甚溥 以刑部尚書致仕卒宣宗以詩弔之

居易被遇憲宗時事無不言前別挾摩多見聽可為

當路所忌乃放意文酒 與弟行簡從弟敏中友愛

東都所居疏沼種樹構石樓香山鑿八節灘自號醉

吟先生為之傳暮節惑浮屠至經月不葷稱香山居

士嘗與胡杲吉叟等九人燕集皆高年不仕者人慕之繪為九老圖 居易於文章精切最工詩以規諷得失當時人爭傳雞林行賈售其國相率篇易以一金其偽者能辨之初與元稹酬詠故號元白又與劉禹錫齊名號劉白其始生七月能展書姆指之無兩字雖試百數不差九歲暗識聲律其篤於文章蓋天稟然 葛常之侍郎云樂天賦有八章其六章託弱柳櫻桃枳橘杜黎野葛水榭凌霄諷在位與附麗權

勢者其八章則曰有木名丹桂云云蓋樂天自謂也
樂天素善李紳而不入德裕之黨素善僧孺楊虞卿
而不入宗閔之黨素善劉禹錫而不入伾文之黨中
立不倚峻節凜然於八木之中而自比於桂殆未為
過也

白敏中字用晦第進士辟李德裕府一見許其遠到高
元裕薦為侍御史轉左司員外郎武宗時李德裕惡
居易薦敏中文詞類兄且有器識召入翰林為學士

後入相武宗崩德裕失勢敏中竭力排之德裕遂貶

崖州司戶

席千五一

姓纂本姓籍晉大夫籍談之後也談十三代孫瓌避

項羽名改席氏漢初徙關東豪族席氏徙安定臨涇

南史席闡文梁武帝受禪除都官尚書出為東陽太守

在郡有能名冬至悉放獄中囚依期而至

北史席法友仕魏歷華并二州刺史後為別將出淮南

欲解朐山之圍及渡淮而朐山敗終光祿大夫

席固字子堅為襄陽著姓少有遠志歸魏拜使持節驃
騎大將軍除昌州刺史 子雅字彥文性方正少以
孝聞位大將軍

唐席豫字建侯襄州人長安中舉學兼流畧詞擅文場
科擢上第時年十六以父喪罷復舉手筆俊拔科中
之俄舉賢良方正異等復舉超拔羣類科遷考功員
外郎韓休輔政舉代已入拜吏部侍郎典選六年拔

舉遠士多至臺閣當時推知人號席公云 凡四以
使者按行清直亡欲當官不為勢權所撼性謹畏與
子弟屬書不作草字帝嘗登朝元閣賦詩羣臣屬和
帝以豫詩最工詔曰詩人之冠冕也

劇子五二

姓纂齊大夫食采於劇因地為姓燕有將劇辛

前漢游俠劇孟洛陽人以俠顯吳楚反周亞夫得孟喜
曰天下騷動大將軍待之若一敵國云

麥 千五三

姓苑云高要始興有此姓

北史麥鐵杖始興人少驍勇走及奔馬好交友重信義
隋萊州刺史無涖政名轉汝南太守稍習法令羣盜
屏迹 除左屯衛大將軍自以荷恩深重每懷竭命
之志遼東之役請為前鋒 子孟才授光祿大夫仲
才季才正議大夫

栢 千五四

風俗通栢皇氏之胤又伯亮父顓頊師栢招帝嚳師
栢罔為周太僕栢國在汝南西平縣為楚所滅子孫
以國為氏

唐栢良器字公亮魏州人父友王奐見之曰爾額文似
臨淮王面黑似顏平原殆能立功及薦之光弼年二
十四更戰陣六十二李希烈圍寧陵過水灌之親令
軍中明日拔城良器以救兵至擇弩手善游者沿汴
渠夜入及旦伏弩發賊乘城者皆死錄功封平原郡

王圖形凌烟閣

栢耆有縱橫學志健而望高王承宗叛者謁裴度且言
願得天子一節馳入鎮可掉舌下之乃以左拾遺往
既至以大誼動承宗乃請獻三川以二子入質由是
聲震一時 太和初李同捷反者斬其首以獻

鄜 十五五

姓纂黃帝之後支孫食采於鄜因氏焉

史記鄜商高陽人也漢王賜商爵信成君以將軍為隴

西都尉遷為左丞相號曰涿侯更封曲周侯子寄字
況與呂祿善大臣欲誅諸呂呂祿為將軍軍北軍太
尉勃不得入乃使人劫商令其子況給祿祿信之故
與禹游勃乃入據北軍遂誅諸呂商卒諡曰景侯子
寄代侯天下稱況賣友也

酈生食其陳留高陽人好讀書家貧落魄無以為衣食
業為里監門吏 見高祖長揖不拜 號為廣野君
說齊王罷歷下軍韓信聞生馮軾下齊七十餘城度

兵襲齊齊王以酈生賣已遂亨之 弟商子疥封高
梁侯更為武遂侯 食其謁高祖自稱高陽賤民又
曰高陽酒徒

後漢文苑酈炎字文勝食其之後有文才解音律言論
給捷多服其能理州郡辟命皆不就

北史酈範字世則父嵩天水太守範仕魏為尚書右丞
青州刺史 子道元字善長為冀州長史後守魯陽
郡表立黌序崇勸學教山蠻伏其威名不敢為寇

道慎字善季位正平太守有能名 道約字善禮性

多造請好以榮利干謁歷東萊魯陽二太守

狄千五六

姓纂周成封少子於狄城因氏焉魯大夫有狄虎彌
古賢人有狄儀仲尼弟子有狄黑衛人漢有博士狄
山

唐狄仁傑字懷英并州人為兒時門人有被害者吏就
詰衆爭辨對仁傑誦書不置吏讓之荅曰黃卷中方

與聖賢對何暇偶俗吏語耶 舉明經調汴州參軍

為吏誣訴閻立本召訊異其才曰仲尼稱觀過知仁

君可謂滄海遺珠矣薦授并州參軍親在河陽登太

行山反顧見白雲孤飛謂左右曰吾親舍其下瞻望

久之雲移乃去 同府參軍鄭崇質母老疾當使絕

域仁傑詣長史蘭仁基請代行仁基咨美其誼每曰

狄公之賢北斗以南一人而已 遷大理丞歲中斷

久獄萬七千人時稱平恕 授侍御史王本立怙寵

自肆仁傑劾其惡朝廷肅然使岐州亡卒數百剽
行人道不通官捕繫紛紛不能制仁傑曰是其計窮
乃明開首原格皆自縛歸帝歎其達權宜帝幸汾
陽宮李沖玄以道出妬女祠更發卒改馳道仁傑曰
天子之行風伯清塵雨師洒道何避邪帝壯之曰真
大丈夫哉出為寧州刺史入拜冬官侍郎持節江
南巡撫吳楚多淫祠凡毀千七百房出為豫州刺
史越王兵敗支黨餘二千人論死仁傑釋其械上疏

曰臣欲有所陳似為逆人申理不言且累陛下欽恤
意表成復毀自不能定然此皆非本惡註誤至此有
詔悉謫戍邊囚出寧州父老迎勞曰狄使君活汝耶
因相與哭碑下囚齋三日乃去至流所亦為立碑初
宰相張光輔討越王軍中恃功多暴索仁傑拒之光
輔怒曰州將輕元帥耶仁傑曰亂河南者一越王公
董士三十萬以平亂縱使暴橫是一越王死百越王
生也如得上方斬馬劍加君頸雖死不恨 天授二

年以地官侍郎同平章事武后曰卿在汝南有善政
然有譖卿者欲知之乎謝曰以為過臣當改以為無
過臣之幸也譖者不願知后歎其長者為來俊臣
所構捕送制獄仁傑書帛置褚衣中子光遠持書上
變后召見因免死貶彭澤令 通天中契丹陷冀州
河北刺史懼驅民保城仁傑曰何自疲民虜來吾自
辦悉縱就田虜亦引去民愛仰之復為立祠 轉幽
州都督賜紫袍龜帶后自製金字十二於袍以旌其

忠 召拜平章事后欲以武三思為太子以問宰相
衆莫敢對仁傑對曰欲以三思為後且姑姪與母子
孰親立廬陵王則千秋萬歲后常饗宗廟三思立廟
不祔姑后感悟即遣迎廬陵王中外大悅時李楷固駱
務整本契丹將後降有司請論如法仁傑稱驍勇可
任貸死至是二人討契丹克之凱旋后舉酒賞其知
人 仁傑所薦張柬之姚崇等皆為中興名臣封梁
國公 子光嗣聖歷初為司府丞武后詔宰相各舉

尚書郎一人仁傑舉之以稱職聞后曰祁奚內舉果得人

狄兼謩字汝諧仁傑孫及進士第剛正有祖風歷三州刺史歲旱發粟賑濟擢給事中遷御史中丞帝曰

卿梁公後當嗣家聲

宋朝狄青字漢臣汾州西河人也初隸拱聖軍選為散直元昊叛擇衛士徙邊以青為延州指使青勇於臨敵常為先鋒前後二十五戰中流矢者八每戰飾以

銅面具敵人望之如神以功遷至秦州刺史涇原路
總管仁宗聞其在陝西數戰勝欲召見問其方略
會賊寇渭州仁宗命圖形以進及元昊稱臣西鄙休
兵入為捧日天武四廂都指揮使知延州擢樞密副
使廣源州蠻儂智高反陷邕州進圍廣州時朝廷以
孫沔余靖為安撫使久未奏功仁宗以南方為憂
青慨然請行除宣徽南院使宣撫荆湖南北經制廣
南盜賊事青至合沔靖之兵自桂林次賓州斬廣西

鈐轄陳曙按其遇賊不戰之罪并殷直袁用等三十
二人悉誅之軍士震恐遂下令止具十日糧明日絕
崑崙關出歸仁鋪先布陳成列而賊以覘者誤謂未
即進遂失險乃悉衆逆戰前鋒孫節戰死山下而賊
氣方銳青躬執白旗麾騎兵出其不意賊衆大潰斬
首二千二百級獲偽官五十七人智高夜縱火焚城
而遁詰朝青入按城中獲金帛鉅萬牛馬數千築京
觀於城北隅招復俘脅者七十二百使還其家青還

入朝復為樞密副使遂拜樞密使在樞密府四年言者謂青家數有光怪以護國軍節度使同平章事知陳州未幾而卒謚武襄

戚千五七

姓纂衛大夫食采於戚因氏焉古賢人有戚子著書漢高祖戚夫人生趙王如意功臣表臨轅侯戚鯁傳封七代

南史儒林戚衮字公文吳郡人少聰慧受三禮大義畧

舉兼太學博士為羣儒推許

宋朝戚綸字仲言應天府楚丘人也父同文字文約幼孤事祖母以孝聞從邑人楊慤受經慤隱居不仕而以女弟妻同文遇疾因託以家事同文為葬其三世之未葬者遭世喪亂亦不復仕且思見混一遂以同文為名慤勉之仕同文曰長者不仕同文亦不仕聚徒講學相繼登科者五十六人踐臺閣者亦至十數尚信義善周人之急所與交皆當世之名士揚徽之

因使至郡多所酬倡及卒徽之與其門人謚曰堅素
先生應天府民有曹誠者即同文舊居廣舍百五十
楹聚書千餘卷以延學者真宗嘉之賜名曰應天府
書院云同文長子曰維仕至戶部郎中綸其次子也
篤於古學善談名教舉進士為沂州簿徙知泰和縣
同文卒特詔令起復泰和民險悍好興訟綸為勸民
詩五十篇言近而易曉老幼多傳之

析 千五八

姓纂左傳齊大夫析歸父衛大夫析朱鉏公子黑背
孫也

後漢方術析像字伯式其先張江者封析侯曾孫國為
鬱林太守因封氏焉國有資財二億像幼有仁心及
國卒乃散金帛資產周施親戚時通京氏易好黃老
言

直千五九

史記直不疑南陽人也為郎事文帝同舍有告歸誤持

同舍郎金去金主疑不疑不疑買金償告歸者來而
歸金亡金者大慙以此稱為長者 景帝拜為御史
大夫 封為塞侯

國 千六十

姓纂左傳齊卿族國氏代為上卿 又鄭穆公子發
字子國生輒字子耳生僑字子產以王父字為氏亦
為國氏焉

魏志國淵字子尼曹操辟為司空掾屬每於公朝論議

堂直言正色退無私焉 使典屯田事倉庫豐實

遷魏郡太守又遷太僕 居列卿位布衣疏食祿賜

散之故舊宗族以恭儉自守太祖以其子泰為郎

翼 千六一

姓纂晉翼侯居翼城因以氏焉

前漢翼奉字少君東海人治齊詩惇學不仕好律歷陰

陽之占以十二律驗人情 諸儒薦之以為中郎

因災異上封事 上疏諫遷都 子孫皆在儒官

伯 千六二

風俗通嬴姓伯益之後

左傳伯宗晉大夫也 梁山崩將召伯宗謀之 伯宗

每朝妻戒之曰盜憎主人民怨其上 伯州犂晉大

夫伯宗子 太宰嚭字子餘姓伯氏州犂之子為吳

太宰

史記伯虔字子析孔子弟子

帛 千六三

姓纂云吳郡人神仙傳有帛和

格 千六四

允格之後漢有御史格班

號 千六五

周王季之子封號號叔子孫以國為姓左傳晉大夫

革 千六六

漢初功臣煇棗侯革朱

禹 千六七

殷末賢人膠鬲之後以王父字為氏

赫 千六八

風俗通云赫骨氏之後

獲 千六九

風俗通宋大夫猛獲之後以王父字為氏

籍 千七十

晉文侯仇弟陽叔生伯鷹司晉典籍遂為籍氏玄孫談

代為晉大夫晉為趙所滅籍氏播於宋

夕 千七一

後漢巴中梁師有夕氏蜀志尚書令夕斌

易 千七二

左傳齊大夫易牙之後魏有易愷晉有易雄

赤 千七三

風俗通帝嚳師赤松子之後見神仙傳

辟 千七四

漢書富人辟子方之後

昔 千七五

風俗通周大夫封昔因氏焉漢有昔登開元有昔安

射 千七六

楚大夫觀射父之後見左傳漢有大鴻臚射咸吳有中

書郎射慈善禮喪服

笮 千七七

漢有笮融丹陽人見吳志

爽 千七八

召公奭之後避漢元帝諱改姓盛氏

糴千七九

左傳晉大夫有糴箴

錫千八十

吳志云漢末有交趾太守錫光古仙人錫壽子之後

激千八一

左傳齊有太史激
漢書淮南王傳有激章

息千八二

媯姓國也為楚所滅子孫以國為氏今新息縣即其故

地

棘千八三

衛大夫棘子成之後見論語

稷千八四

后稷之後漢稷嗣君叔孫通支孫亦為稷氏

即千八五

漢單父令即費其先食采即墨因以命氏

職千八六

周禮職方氏因官為姓漢有山陽令職洪開元有職南

金蔡州人明史記

嗇千八七

風俗通云古嗇夫子孫因氏焉

力千八八

黃帝臣力牧之後 漢有魯相力題

食千八九

風俗通漢有博士食子通

敕十九十

後燕合浦公敕勃東夷人

墨十九一

孤竹君之後本姓墨台後改為墨氏梁郡戰國時墨翟
宋人著墨子

勒十九二

晉鎮南將軍王歆騎督勒蒲討張昌於隋郡

特千九三

左傳晉大夫特宮

平定晉大夫特宮之記

厥竹書之野本致墨台野好燕墨丹尋昭輝國和墨原

厥竹書之野本致墨台野好燕墨丹尋昭輝國和墨原

野燕台衛公特為東夷人

野燕台衛公特為東夷人

野名賢氏族言行類稿卷五十二

欽定四庫全書

名賢氏族言行類彙卷五十三

宋 章定 撰

薛 千九四

姓纂黃帝二十五子一為任姓裔孫奚仲居薛至仲
虺為湯左相代為侯伯歷三代凡六十四葉周末為
楚所滅公子登仕楚懷王賜沛邑為大夫遂以國為

氏

孟子謂薛居州善士也使之居於王所在王所者長幼
卑尊皆薛居州王誰與為不善

前漢薛廣德字長卿沛郡人以魯詩教授四蕭望之薦

其經行宜充本朝為博士遷諫議大夫御史大夫

元帝欲御樓船廣德諫宜從橋曰不聽臣臣自刎
以血汚車輪後乞骸骨賜安車駟馬縣其安車傳

子孫

薛宣字贛君東海郯人察廉補不其丞以明習文法補

御史中丞所貶退稱進白黑分明為陳留太守 盜
賊禁止吏民敬其威信 思省吏職求其便安下至
財用筆研皆為設方畧 其法律任廷尉有餘經術
文雅足以謀王體斷國論身兼數器

後漢薛漢字公子世習韓詩父子以章句著名建武初
為博士當世言詩者推漢為長

吳志薛綜字敬文以名儒居師傅之位乃兼選舉甚為
優重 子瑩字道言累遷為選曹尚書太子太傅涉

學既博文章尤妙同寮之中瑩為魁首 經學記述
之才如瑩者少遂召為左國史 或問陸喜薛瑩最
是國士之第一者乎曰在乎四五之間

晉薛兼字令長瑩之子清素有器宇拜丹陽尹遷尚書
領太子少傅自綜至兼三世傅保

南史薛安都世為強族少以勇聞仕宋為建武將軍隨
征關陝率步騎居前所向克捷後降魏 從子深果
幹有氣力仕齊除淮陰太守遷右將軍

薛天生見孝義傳

北史薛彪子代人仕魏為內行長典奏諸曹事當官正直內外憚之子琚字曇珍宣武曰卿風度峻整姿貌秀異後當升進何以處官荅曰宗廟之禮不敢不敬朝廷之事不敢不忠行洛陽令部內肅然獄止三人孝明嘉之賜練百疋

薛提為冀州刺史有政績

薛辨字允白父强字威明幼有大志懷軍國籌略可

與撥亂濟時

辨儻多大畧豪傑多歸慕之歸魏

為雍州刺史明元曰朕委卿西蕃志在關右宜克終
良筭與朕為長安主人辨但以數千衆摧抗赫連氏
帝甚褒獎之子謹字法順仕魏除秦州刺史命立庠
序教以詩書河汾之地儒道更興

薛端字仁直累遷吏部郎中每有奏請不避權貴周文
帝嘉之 自居選曹先盡賢能貴遊子弟才劣行薄

者未嘗升擢 子胄字紹玄仕隋為兗州刺史繫囚

數百胄剖斷旬日便了囹圄空虛疏決沂泗二水陂
澤盡為良田號為薛公豐兗渠 從祖弟濬字道賾
仕隋歷考功侍郎 弟湖有懿行與物無競好以德
義服人鄉閭化其風教咸以敬讓為先為本州別駕
除河東太守 子聰字延智前言往行多所究悉起
家為著作佐郎遷侍御史凡所彈劾不避強禦貴戚
斂手為孝文所知外以德器遇之內以心膂為寄除
齊州刺史卒吏人追思留其所坐榻以存遺愛 聰

子孝通字士達博學有雋才後遷中書郎深為節閔所知重內典機密外參朝政汲引人物知名之士多見推薦 子道衡字玄弼武成立兼散騎常侍接對周陳二使 陳使傅綽聘齊贈詩五十韻道衡和之南北稱美魏收曰綽所謂以蚓投魚耳出為襄州總管隋文帝曰今爾之去朕如斷一臂 聰弟子善字仲良為汾陰令稱最太守令兼督六縣事 弟慎字伯護仕周為潮州刺史殷勤勸誡蠻夷翕然從化曰

今日始知刺史真人父母也

薛寘幼覽篇籍好屬文仕周卒浙州刺史性至孝年

齒雖衰溫清之禮朝夕無違

薛慳字景猷負才使氣未嘗趨世祿之門初為羈旅

不被擢用嘆曰豈能五十年戴幘死一校尉周文

時拜中書侍郎

薛孤延代人從神武起兵

薛世雄字世英仕隋累遷車騎將軍性廉慎行軍破敵

之處秋毫無犯

唐薛萬均燉煌人與弟萬徹客幽州以材武為羅藝所厚善與藝歸款高祖從李靖討吐谷渾勇益三軍追奔至磧石山斬之遷左衛大將軍又副侯君集擊高昌進潞公 後嘗賜羣臣膜皮及萬徹而誤呼萬均愴然曰萬均朕勲舊忽口其名豈死者有知冀此賜乎 因命取焚之舉坐感嘆

薛萬徹從李靖討頡利可汗以功授統軍貞觀間帥師

三萬伐高麗拔其城

薛叔字伯褒蒲州人道衡子年十二能屬文房玄齡言之秦王王召見問方畧所對合旨授府主簿時討王世充軍事繁叔為書檄露布或馬上占辭該敏如素構秦王圍王世充於洛陽世充求救於竇建德建德進軍城畢之東原遣使與世充相聞秦王集將佐議之皆請避其鋒叔曰世充保據東都府庫充實所將之兵皆江淮精銳即日之患但乏糧耳以是之故

為我所持求戰不得守則難久建德遠來赴援亦當
致死於我若縱之至此兩寇合從轉河北之粟以饋
洛陽則戰爭方始偃兵無日混一之期殊未有涯今
宜分兵守洛陽深溝高壘世充兵慎勿與戰大王親
帥驍銳先據成臯厲兵訓士以待其至以逸待勞決
可克也王從之果俱擒之上書諫王止田獵王曰覽
所諫知成我者卿也明珠兼乘未若一言

薛元超叔子九歲襲爵長好學善屬文高宗即位遷給

事巾省巾有盤石祖道衡嘗據以草制元起每見輒
流涕 帝校獵溫泉諸蕃酋長得持弓矢從元起奏
夷狄野心非所宜從詔可帝幸東都留輔太子監國
時太子射獵元起諫之帝知之遣使厚賜之

薛元敬與叔及族兄德音齊名世稱河東三鳳叔為長
雖德音為鶯鶯元敬年少為鵷雛 武德中為天策
府參軍直記室文學館學士如晦嘆曰小記室不可
得而親不可得而疏

薛稷字嗣通道衡曾孫擢進士第累遷中書舍人與從
兄曜更踐兩省俱以辭章名 虞褚以書專家後莫
能繼稷外祖魏徵家多藏虞褚書銳精臨倣結體道
麗遂以書名天下畫又絕品

薛仁貴絳州人王師攻安市城高麗率兵拒戰太宗命
諸將分擊仁貴驍悍欲立奇功乃着白衣自標顯持
戟呼而馳所向披靡軍乘之賊潰帝曰朕不喜得遼
東喜得虜將 高宗幸萬年宮山水暴至登門大呼

以警宮內帝出乘高俄而水入帝寢帝曰賴卿以免
始知有忠臣也 副鄭仁泰為鐵勒道行軍總管帝

曰古來有穿七札者卿試以五甲射焉仁貴一發洞
貫帝取堅甲賜之 九姓衆十餘萬令驍騎數十來
挑戰仁貴發三矢輒殺三人於是虜氣皆阻軍中歌
曰將軍三箭定天山壯士長歌入漢關 提卒二千

進攻扶餘城威震遼海坐事貶象州會赦還帝召見
曰今遼西不寧瓜州路絕卿安得高枕不為朕指麾

邪拜瓜州部督率兵擊突厥元珍於雲州突厥問曰
唐將為誰曰薛仁貴突厥曰吾聞薛將軍流象州死
矣安得復生仁貴脫兜鍪見之突厥相視失色下馬
羅拜仁貴進擊破之

薛訥字慎言仁貴之子開元初玄宗講武新豐諸部頗
失序唯訥軍不動帝令輕騎召之至軍門不得入禮
成尤見慰勞吐蕃衆十萬寇臨洮入蘭州剽牧馬
詔訥擊之破其衆擒其首拜羽林大將軍子嵩氣

豪邁不肯事產利以膂力騎射自將 嵩子平字坦

塗 平子從字順之

薛登常州人通貫文史天授中遷左補闕是時四夷質
子多在京師及還並為邊害登諫之 出為常州刺
史屬宣州賊鍾大眼亂登嚴勒守備合境被安

薛珽字温如河中寶鼎人以蔭為懿德太子廟令遷乾
陵臺令歲中以清白聞課第一子存慶字嗣德及進

士第

薛播河中人開元天寶間兄弟七人皆擢進士第為衣

冠光煒

薛革河中人七世祖道實革於文章中長於詩

薛存誠字資明河中人中進士第拜御史中丞浮屠鑿

虛倚官豎為姦存誠窮治之得贓數十萬權近保救

於帝欲赦之存誠曰獄已具請先殺臣鑿虛卒抵死

帝謂宰相曰持憲無易存誠者 性和易於人無所

不容當官毅然不可奪 子廷老字商叟及進士第

讜正有父風為拾遺在公卿間侃侃不干虛譽推為
正人

薛戎字元夫河中人年四十餘不仕李衡辟幕府三返
乃肯應 柳冕辟佐其府馬總貶泉州冕欲除總以
附倖家使戎攝刺史按其罪戎曰以是待我邪我始
不願仕正謂此爾不肯從冕怒囚之會冕死得解自
放江湖 為吏不尚約束居官時無灼灼可驚者已
罷則懷之俸廩調濟內外親戚

薛放戎弟端厚寡言穆宗寵待尤至帝嘗問朕欲學
經與史何先曰六經者聖人之言史記道成敗得失
然謬於是非非六經比帝曰安得其要曰論語六經
之菁華孝經人倫之本

薛大鼎字重臣蒲州人為山南道副大使開屯田以實
倉廩遷滄州刺史無棣渠久廢塞大節浚治之民為
歌之與鄭德本賈敦頤皆有治名故河北稱鐺脚刺
史

宋朝薛映字景陽唐中書令元超八世孫也後徙居於蜀父允中仕孟氏為給事中還朝為都官郎中映舉進士為大理評事通判綿州稍遷殿中丞為監察御史知開封縣太宗召對顧謂左右曰薛映賢士也除江南轉運使真宗東封為東京留守判官遷給事中出知河南府以樞密直學士知昇州徙揚州進刑部侍郎建言昇州官有牛賦民出租牛死租不得蠲真宗覽奏矍然曰有是哉此豈朝廷所知邪悉蠲之卒

謚文恭

薛奎字宿藝絳州正平人也父化光善命術奎生知其必致公輔舉進士為隰州推官向敏中薦其才為殿中侍御史出為陝西轉運使仁宗即位擢龍圖閣待制知開封府以嚴為治肅清京師拜御史中丞上疏論擇人求治崇節儉屏聲色十數事仁宗深嘉納改樞密直學士知益州為政明決蜀人以張詠比之召為龍圖閣學士三司使未幾拜參知政事遷給

事中仁宗嘗謂輔臣曰臣之事君常見有始而無終者奎曰保終始者豈獨臣下如唐開元勵精圖治天下晏然及其既久放意荒侈以至大亂此不可不監也仁宗深納之明道二年章獻謁太廟欲被天子黻冕臣下依違不決奎不可且曰太后必欲被黻冕見祖宗不知作男子拜耶女子拜耶乃止及章獻崩仁宗見羣臣泣曰太后疾不能言而猶數引其衣若有所屬何也奎遽曰其在黻冕也

然服之何以見先帝乎仁宗大悟卒以后服斂苦
喘疾數辭位罷為戶部侍郎資政殿學士判都督卒
謚簡肅奎持身端重不苟合真宗時數宴大臣至有
霑醉者奎諫曰陛下勤心萬務而簡乎燕幸今天下
誠無事而飲樂無度又大臣數被酒無威儀非所以
為朝廷重真宗善其言及輔仁宗謀議無所避尤善
知人范仲淹龐籍明鎬在下位時奎皆以公輔許之
卒如其言

薛向字師正京兆長安人也以蔭為太廟齋郎調永壽簿
稍遷監在京權貨務知鄜州向言河北糴法之弊以
為備邊十四州悉仰食度支歲費五百萬緡得米粟百
六十萬斛其實才直三百萬緡耳而歲常虛費二百萬
緡入豪商蓄販之家人既用見錢實價革去虛加之弊
矣雖然必有以佐之則其法可行故邊穀貴則糴澶魏
粟以給邊新陳未交則散糴價以救民乏軍食有餘
則坐倉以待不足使見錢行而三利舉則河北之穀不

可勝食矣於是置糴便糧草司以任向又以為提點
河北刑獄兼糴便事入為開封府判官三司度支判
官陝西轉運副使兼制置解鹽又以向提舉買馬監牧
向吏事精銳所至以辦治聞 向使陝西八年其課
最為緡千三百四十餘萬市鹽於官為勦三千三百一
十餘萬市馬於邊為匹四萬五千歛糴芻糧為石東
五千二百二十餘萬而奉昭厚二陵給賜予刺兵民
別費錢糧又百萬王安石執政以向為江淮等路發

運使領均輸之職運舟兵工交利侵盜貿易甚則託
風水沉舟以減迹歲不下減二十萬斛向始募客舟
以官舟運費寡而物良而舊弊悉去兼領慶南福建
坑治市易拜天章閣待制權三司使遷任諫議大夫
王韶開洮河費不貲向悉力營辦遷龍圖閣直學士
以樞密直學士給事中知定州遷工部侍郎入見論
兵於上前遂拜同知樞密院事寵知潁州改隨州卒
有子嗣昌仕徽宗時為尚書

折千九五

宋朝折德辰世居雲中父從阮自晉以來仕周至靜難
軍節度使五代史有傳從阮鎮府州以德辰為牙校
世宗建府州為永安軍以德辰為節度使子御勲
字世隆德辰鎮府州奏為右職德辰卒以御勲領汾
州團練使權知府州卒御勲弟御卿知府州子
唯正歸本朝其弟唯昌繼之卒以其弟唯忠知府州
卒子繼祖嗣領州事卒子當襲而請授其兄之子克

柔克柔卒而繼祖兄繼閔之子克行襲知府州克行
沈勇有力善撫士卒在邊三十年戰功最多虜畏其
威名號折家父官至秦州觀察使卒贈武安軍節度
使以其子四方館使廉州刺史可大為榮州團練使
知府州

折可適字遵正其先與魏道武俱起雲中號代北著姓
郭達帥鄜延見之曰真將種也薦之試藝廷中為鄜
延路經略司准備差使擢知寧岷環蘭四州再知鎮

戎軍後進武安軍留後知渭州拜淮康軍節度使召

為佑神觀使復帥涇原卒子彥質

洩 千九六

左傳鄭大夫洩駕陳大夫洩冶

列 千九七

風俗通古帝王列山氏之後鄭有隱者列禦寇著書八

篇號列子

頡 千九八

姓苑云蒼頡之後

節 千九九

周禮掌節上士子孫以官為名

齧 千一百

莊子齧缺堯時賢人學於王倪既通許由之師也

舌 千百一

左傳越大夫舌庸

悦 千百二

後燕錄左僕射悅綰鮮卑人清泉侯真亦其族也

說千百三

姓苑云傳說之後以王父字為氏

汲千百四

風俗通衛宣公太子伋之後居汲因氏焉

史記汲黯字長孺濮陽人也其先有寵於古之衛君至

黯七世世為卿大夫黯以父任景帝時為太子洗馬

以莊見憚 以便宜發河內倉粟以賑貧民遷為榮

陽令黥耻為令病歸田里上聞乃拜中大夫以數切
諫不得久留內遷為東海太守其治責大指而已不
苛小多病卧閨閣內不出歲東海大治稱之召以為
主爵都尉列於九卿性倨少禮面折不能容人之
過古有社稷之臣如黥近之矣武帝不冠不見
之也淮南王謀反憚黥曰好直諫守節死義難惑
以非拜為淮陽太守見上曰臣常有狗馬病力不
能任郡事願為中郎出入禁闥補過拾遺上曰君薄

淮陽耶吾今召君矣顧淮陽吏民不相得吾徒得君之重卧而治之以諸侯相秩居淮陽卒上以黜故官其弟仁至九卿子偃至諸侯相

北史節義汲固為兗州從事刺史李式坐事被収固為藏其子憲長育之後刺史高祐嘉其節義以為主簿

習 千百五

風俗通云習國名漢有習響為陳相

晉習鑿齒字彥威襄陽人宗族盛富世為鄉豪少有才

氣以文筆著稱 桑門釋道安與之相見曰彌天釋
道安鑿齒曰四海習鑿齒時人以為佳對為滎陽太
守 著漢晉春秋 子辟彊才學有父風位至驃騎
從事中郎

隰 千百六

左傳齊大夫隰朋 史記齊有隰靈田成子時人

蓋 千百七

姓纂漢有蓋公

前漢蓋寬饒字次公魏郡人明經為郡文學以孝廉為
郎舉方正對策高第遷諫大夫擢司隸校尉刺舉無
所回避 許伯酌寬饒寬饒曰無多酌我我乃酒狂
魏其侯笑曰次公醒而狂何必酒也

後漢蓋延字巨卿漁陽人長八尺彎弓三百斤 光武
以為虎牙將軍

蓋勲字元固舉孝廉領漢陽太守時人饑相漁食勲調
穀廩之先出家糧以率眾存活者千餘人

唐蓋文達冀州人明春秋三家刺史竇抗集諸生講論
孔穎達劉軌思並以耆儒開門受業是日悉至而文
達依經辨舉皆諸儒所未叩一坐厭歎抗竒之問安
所從學劉焯曰若人岐嶷出自天然以多問寡則焯
為之師抗曰氷生於水而寒於水其謂是耶 宗人
文懿亦以儒學稱當時號二蓋為國子助教既
升席譬曉微密遠近宗仰

沓 千百八

官氏志沓盧氏改為沓氏

北史節義沓龍超

合 千百九

左傳宋大夫合左師之後向戌也

命 千百一十

官氏志大莫千氏改為命氏

葉 千百十一

風俗通楚沈尹戌生諸梁字子高食采於葉因氏焉

吳志有都尉葉雄

新序子張見魯哀公七日而哀公不禮託僕夫而去曰
臣聞君好士故不遠千里之外服省露冒塵垢百舍
重趼不敢休息以見君七日而君不禮名之好士也
有似葉公子高之好龍也葉公子高好龍鈎以寫龍
鑿以寫龍屋室雕文以寫龍於是龍聞而下之窺頭
於牖拖尾於堂葉公見之棄而還走失其魂魄五色
無主是葉公非好龍也好夫似龍而非龍者也君非

好士好夫似士而非士者也

宋朝葉夢得字少蘊蘇州人登科為丹陽尉蔡京雅知之既拜相亟召用旬歲間歷清要遂入翰林為學士時年方壯文筆清麗一時欽重守藩奉祠僅三十年建炎初召為戶侍再入翰苑遂參大政出帥建康移福唐以節度使致仕居霅溪卜山之下開山為徑玲瓏秀發自號石林居士詩酒以娛其老諸福全備當世罕有及之者長編載少蘊安危利害邪正休戚之

論與朋黨之對及潁昌救荒之政皆足嘉尚

葉顥字子昂仙遊人第進士調南海簿屬攝尉事有欲以所獲鹽授公公曰仕途發軔如造屋建柱石柱石不正屋隨以傾吾方入仕豈宜自欺聞者歎服任滿調建州錄事部使者賀公允中多以事屬公公參酌情法號為得平後知上虞縣賀公薦名除將作監簿公往謝曰自建水以糾曹趨役別去二十年咫尺書之敬不一通記府豈謂乃賜薦駁賀公笑曰唯二十

年不通書今日所以相薦孝宗初為給事中除吏
書尋除參知政事兼同知樞密繼提舉洞霄宮召對
上問勞加禮且曰卿之清德自是愈光矣拜左僕射
同平章事薨贈特進林光朝以詩哭之傳家唯舊德
無地著樓臺人以為實錄云 元璘元澣元汴元澤
崇圭皆丞相諸孫也

聶 千百十二

姓纂衛大夫食采於聶因氏焉史記刺客聶政軼人

漢有潁川太守聶良護羌尉尉聶尚又有聶壹吳志
有將軍聶支石趙錄有中書令聶熊

宋朝忠義聶昌撫州臨川人也

法 千百十三

姓纂本媯姓田氏之胤齊襄王名法章支孫以名為
氏

後漢法雄字文彊齊襄王法章之後秦滅齊子孫不敢
稱田姓故以法為氏 為青州刺史行部錄囚徒察

顏色多得情偽長吏不奉法者皆解印綬去遷南郡
太守

逸民法真字高卿博通內外圖典為關西大儒 太守
欲屈以功曹真曰明府若欲吏之真將在北山之北
南山之南矣 號玄德先生

蜀志法正字孝真為蜀郡太守揚武將軍外統都畿內
為謀主後為尚書令

涉 千百十四

左傳晉大夫涉他神仙傳有涉玉

捷 千百十五

漢書藝文志有捷子二篇云齊人風俗通云邾公子捷
菑之後以王父字為氏

接 千百十六

三輔決錄有接子著書十篇

輒 千百十七

闕

夾 千百十八

藝文志有夾氏春秋

俠 千百十九

韓俠累之後急就章有俠却敵

鄴 千百二十

風俗通漢有梁令鄴風

甲 千百二十一

風俗通太甲之後一云鄭大夫石甲父之後以王父字

為氏



名賢氏族言行類稿卷五十三